

中造化十二時中常清常淨不起纖毫塵念則方是修行日就月將無有間斷次做神仙苟或虧功失行怎得了達我觀汝輩十二時中不曾有一箇時辰專心在道受了十方施主供養如何還得一朝合眼復入輪迴何時出期我今叮嚀說與汝等但自澄心遣欲萬緣不染神炁冲和便是道也依此修行不得到錯了若因循怠墮行持不到非吾罪也豈不念汝等七祖生前造諸惡業冥中受諸罪苦望子孫成道救拔得生天各宜以此為念發堅固心抱道而死此吾所願也珍重門人聞是慈音皆惓然自得競加勉勵焉

師謂衆曰道無形名是神炁之祖也元炁降化神明自生鍊神合道乃是修真其餘名相紛紜難為憑準我念為汝舉其大綱夫修此之要不離神炁神炁是性命性命是龍虎龍虎是鉛汞鉛汞是水火水火是嬰姤嬰姤是真陰真陽真陰真陽即是神炁種種名相皆不可着止是神炁二字而已欲要養炁全神須當屏盡萬緣表裏清淨久久精專神炁炁

冲三年不漏下丹結六年不漏中丹結九年不漏上丹結是名三丹田備九轉功成骨髓凝化血脉成真內完外溢光影徹明寂然不動應感無窮千變萬化生在立亡三萬六千神靈踊躍遊行天下三界司迎八難之中千凶萬毒莫能消亡至於大劫變化洪災四衝神滿太虛亦無所礙故天有時而崩地有時而陷山有時而摧海有時而竭凡有相者終劫於壞惟學道者到神與道合處則永劫無壞兼功及九祖昇上清矣

丹陽真人語錄

無為清靜長生真人至真語錄序 再三  
我聞道在域中所宜馴致仙居象外不可苟求故樂天詩云若非金骨相不列丹臺名非種百千劫善根得三五一真之氣安能至此境哉今長生子劉先生賦是相藉是名昔遇重陽玉真人濟度點化出俗入道明識慧性了達踰通昨被宣詔見有詩曰昔年陝右先皇詔今日東萊聖帝宣再歲告歸官僚索詞云飄飄雲水却東萊太微仙伴星冠士正似陳希夷昔承宋眷辭返華山詔答云玉堂金闕暫喜於來朝岫幌雲軒遽求於歸隱此二大士之不羈各一明朝之擅美蓋營道同耳易地則然自先生躬還故里觀住太微箋注諸經祖述三聖以文章疎放以翰墨嬉游著編籍演教法遵釋氏重輕之戒造玄皇衆妙之門服宣父五常之行緝田宅發糶粟申申如也凡有述作競彫鏤以流傳新視聽於衆庶諷誦於人口薰陶乎民風知見者歸依頑鄙者俊改一日先生門人徐李二師遠來垂訪過溪館入愚齋息杖履之勞餽水陸之味

良久出示先生至真語錄一帙懇求序引義不復辭余乃洗心徧覽令人警誠覺悟頓欲割俗緣出業障邪始終列八十款問答踰一萬言包羅揆叙引證論評根天地之化迹陰陽之用示死生之說明禍福之報談真空之相懲貪瞋之欲以至苦樂之由情偽之作清濁之源高下之本若此者甚衆無不究竟皆引用黃老與義斷之天下之事畢矣可使衆生判疑歸正渙然冰釋為鑿大昏之窟闢靈照之戶一驅解脫矣於是得超苦海登覺岸除三有五濁之穢證三昧一空之因去十二類舊染之污受三千界更生之樂信出自真語啓迪導化法緣所致也豈不偉歟昔秦和壬戌歲上元日漢澤端城雙溪虛白道人韓士倩彥廣謹序

總目

凡八十問

- |    |    |    |    |
|----|----|----|----|
| 問法 | 問空 | 問知 | 問見 |
| 問善 | 問惡 | 問賢 | 問愚 |
| 問生 | 問死 | 問貴 | 問賤 |
| 問高 | 問下 | 問樂 | 問苦 |
| 問清 | 問濁 | 問顯 | 問隱 |
| 問大 | 問小 | 問虛 | 問實 |
| 問閑 | 問忙 | 問去 | 問來 |
| 問平 | 問常 | 問喜 | 問憂 |
| 問得 | 問失 | 問福 | 問禍 |
| 問捨 | 問取 | 問中 | 問邊 |
| 問著 | 問離 | 問人 | 問我 |
| 問辯 | 問訥 | 問損 | 問益 |
| 問長 | 問短 | 問巧 | 問拙 |
| 問毀 | 問讚 | 問忘 | 問食 |
| 問道 | 問俗 | 問非 | 問是 |
| 問思 | 問世 | 問妙 | 問微 |
| 問方 | 問圓 | 問應 | 問變 |
| 問情 | 問物 | 問機 | 問慮 |

- 問親 問疎 問遠 問近  
問行 問住 問唯 問衆